

'Ikan rakyat' naik di Pulau Pinang, Negeri Sembilan... Kelantan turun

UM 26/06/23 M/S 10

Oleh **BADRUL HAFIZAN MAT ISA, SAFINA RAMLI, ROSLIZA MOHAMED, TENGKU DANISH BAHRI TENGKU YUSOFF dan ROHANA ISMAIL**
utusannews@mediamulia.com.my

BALIK PULAU: Harga 'ikan rakyat' terutama kembung di negeri ini naik mendadak sejak seminggu lalu dipengaruhi hasil tangkapan yang rendah berikutan nelayan tidak dapat ke laut gara-gara cuaca tidak menentu.

Tinjauan *Utusan Malaysia* mendapati, purata kenaikan harga ikan naik antara RM2 hingga RM4 sekilogram (kg).

Jenis ikan yang mengalami kenaikan harga adalah ikan kembung (besar) daripada RM12 kepada RM14 per kg; ikan kembung (kecil) daripada RM6 kepada RM8 per kg; ikan selang (RM10 ke RM12 per kg), ikan tongkol (RM10 kepada RM12 per kg); ikan kerisi (RM10 kepada RM12 per kg) dan ikan selar (RM20 kepada RM24 per kg).

Seorang peniaga, Lai Huat Ling, 60, berkata, harga ikan kembung meningkat kerana bekalan ikan itu kurang di pasaran manakala permintaan ikan berkenaan pula tinggi.

"Berbanding minggu lalu, minggu ini, cuaca tidak menentu dengan keadaan hujan dan angin kuat sehingga menyebabkan nelayan tidak dapat turun ke laut.

"Kenaikan harga ikan kembung adalah antara RM2 berbanding minggu lalu, minggu ini harga ikan kembung (besar) naik daripada RM12 kepada RM14 per kg; ikan kembung (kecil) naik daripada RM6 kepada RM8 per kg," katanya di sini, semalam.

Menurutnya, pelanggan di daerah ini juga tidak gemar membeli ikan sejuk beku dan memilih untuk mendapatkan ikan segar daripada peniaga.

Seorang nelayan di kawasan Pulau Betong, Arshad Omar berkata, selain faktor cuaca, tangkapan ikan kembung pada masa ini sangat berkurangan kerana anak-anak ikan yang belum matang tetap menjadi buruan nelayan yang tamak.

PENIAGA TIADA PILIHAN

Di Seremban harga ikan mabung dan selar meningkat RM1 sehingga RM2 bagi setiap kilogram.

Peniaga di Pasar Ampangan di sini, Hafiz, 34, turut memak-



PELANGGAN membeli ikan di Pasar Chabang Tiga, Kuala Terengganu, semalam. - UTUSAN/PUQTRA HAIRRY

lumkan akan berlaku sedikit peningkatan harga ketika memasuki musim perayaan.

Tambahnya, berbanding harga kira-kira sebulan lepas memang terdapat peningkatan dan ia juga dikaitkan dengan permainan harga di peringkat peraih.

"Rata-rata peniaga di sini mendapat bekalan ikan dari Pasar Besar Seremban dan mereka pula mendapatkan bekalan dari Pasar Selayang. Kami tahu harga ikan di jeti tidak naik, cuma apabila sampai di peringkat peraih dan orang tengah, ia sudah meningkat.

"Seperti ikan mabung hari ini kami menjual sekitar RM26 bagi sekilogram kerana kami dapat dari pembekal juga sekitar RM22 sekilogram. Apabila tiba musim perayaan memang kami dapati terdapat sedikit peningkatan harga," katanya.

Tinjauan di pasar tersebut mendapati ikan selar dan ikan mabung dijual RM24 sehingga RM26 sekilogram.

Di Pasar Besar Seremban pula kedua-dua jenis ikan itu dijual pada harga lebih rendah iaitu sekitar RM14 sehingga RM15 sehingga RM18 sekilogram.

Seorang peniaga, Chong, 51, memberitahu harga ikan yang dijual sememangnya tidak me-

mentu dan ia banyak bergantung kepada hasil tangkapan.

"Jika mahu katakan berlaku peningkatan harga ikan, susah untuk dijangkakan kerana ia tidak menentu. Sekiranya kurangnya hasil tangkapan memang harga akan tinggi sedikit," katanya lagi.

KELANTAN CATAT PENURUNAN HARGA

Bagaimanapun di Pasar Siti Khadijah, Kota Bharu dan Pasar Tasek Raja, Pasir Mas, Kelantan harga ikan turun RM2 hingga RM5 mengikut gred tertentu selepas mengalami kenaikan sejak beberapa minggu lalu.

Di Pasar Siti Khadijah ikan pelaling dijual RM10 sekilogram (s/kg) berbanding minggu lepas RM12 per kg harga manakala ikan kembung RM12 hingga RM20 per kg mengikut gred berbanding sebelum ini RM25 per kg.

Ikan selar dijual RM12 hingga RM16 per kg berbanding sebelum ini RM25 per kg, ikan selang RM8 hingga RM10 per kg berbanding sebelum ini RM12 hingga RM16 per kg.

Di Pasar Besar Bandar Tasek Raja harga ikan selang, cencaru, tongkol dan kembung turun RM4 hingga RM2 kepada RM8 hingga RM12 per kg.

Bercakap kepada *Utusan*

Malaysia, peniaga di Pasar Siti Khadijah, Mohd. Junaidi Mat Nawi 36, berkata, ketika ini bekalan bahan mentah itu mudah diperoleh berbanding dua minggu lalu.

"Harga pula tidak mahal dan saya memperoleh bekalan itu daripada pemborong di Pusat Transformasi Luar Bandar (RTC) Tunjong," katanya.

Seorang lagi peniaga, Jafar Abdul Rahman, 63, berkata, walaupun bekalan ikan sudah pulih, namun pelanggan kurang membeli pada hari biasa kecuali hujung minggu.

"Mungkin disebabkan harga ikan yang tidak stabil menyebabkan kalangan pelanggan memilih untuk membeli ayam," ujarnya.

Sementara itu di Pasar Tasek Raja Pasir Mas, harga ikan selang yang mencecah RM16 per kg dua bulan lalu turun sehingga RM4 akibat lambakan sejak minggu lalu.

Seorang peniaga ikan, Aswad Fauzi, 29 memberitahu, harga ikan sudah kembali stabil selepas mengalami kenaikan pada minggu lalu.

Katanya, peningkatan itu berlaku susulan bulan cerah yang menyebabkan bekalan menjadi kurang.

"Saya tidak menolak kemungkinan ikan akan mengalami kenaikan menjelang sambutan Hari Raya Aidiladha, Khamis ini.

LAMBAKAN IKAN PENGARUHI HARGA TURUN DI TERENGGANU

Di Kuala Terengganu lambakan bekalan menyebabkan harga beberapa jenis ikan di pasar basah di daerah ini turun RM1 sehingga RM4 per kg.

Di Pasar Chabang Tiga di sini ikan selang, kembung, cencaru, tongkol dan pelaling dijual lebih rendah berbanding kebiasaan.

Seorang peniaga, Hamzah Mat Ali, 62, berkata, kekerapan nelayan tempatan turun ke laut dengan hasil yang banyak mendorong kejatuhan harga sumber protein berkenaan.

"Antaranya ikan selang yang sebelum ini dijual pada harga RM14 sekilogram kini sudah turun RM2 kepada RM12. Malah ada peniaga yang menjual harga serendah RM10 sekilogram.

"Begitu juga ikan jenis cencaru yang berharga RM10 sehingga RM12 sekilogram berbanding RM11 sehingga RM14 sekilogram ketika awal bulan Mei yang lalu," katanya.

Tinjauan di pasar sama turut mendapati harga ikan lain seperti kembung daripada RM24 sekilogram turun sehingga RM20, tongkol daripada RM15 kepada RM12 sekilogram dan pelaling RM12 sekilogram.

Seorang lagi peniaga, Azmi Mohamad, 58, kesemua bekalan ikan diperoleh daripada nelayan di negeri itu membolehkan hasil laut itu dijual pada paras harga yang stabil dan normal.

"Namun, berdasarkan pengalaman, harga ikan mungkin naik sedikit satu atau dua hari sebelum Aidiladha kerana faktor pengangkutan sebelum kembali menurun seminggu kemudian," ujarnya.

Peniaga, Nurul Ainsha Hamzah, 26, pula berkata, harga hanya akan mula melambung tinggi sekiranya berlaku bekalan 'terputus' sehingga peniaga terpaksa mendapatkan ikan dari negeri lain.

"Biasanya apabila situasi itu berlaku, harga ikan akan naik mendadak kerana kami membeli dari pembekal di Kelantan atau Johor dan terpaksa menanggung kos pengangkutan lori.

"Memandangkan sekarang musim bulan gelap, ramai nelayan Terengganu menangkap ikan dengan menghabiskan masa lebih seminggu di tengah laut dengan hasil lumayan," ujarnya.